



兩兩聯鑣出禁城東風蹀躞馬蹄輕百年身世牢籠裡得遂看花幾度行

行樂圖為長洲韋縣丞賦

十年轍跡遍塵寰謁告歸來暫得閒行路斷橋流水外數聲啼鳥落花間

全案青詞

景常西山入

漢

七十二峰足徵集卷七十一

武峰吳定璋友篁菟錄

瀆川盛錦庭堅編訂

張延基

延基字埴允號芙嶼別號漱菌子派出東山葉巷先世流寓金陵占籍上元為縣諸生食餼廩娶未踰歲即讀書僧舍三年不歸中順治壬辰科進士初任山東蓬萊縣知縣再任四川龍安府石泉縣知縣當是時永清甫定凋瘵未起官署燬於兵火

七十二峯

東山

卷七十一

虎狼晝遊城郭公與一友一僕栖息古廟中間民疾苦召集流亡緩催科勤撫字會平籓遷徙之役至臺臬徵夫檄下如雨民情皇皇公爲力請獲免民歡噪若雷僉曰吾儕自頂至踵悉受侯賜苟有所用吾力罔敢靳公曰免於公而役於私非情且爾民甚矣憊吾奚忍重勞之以自求安逸乎民固請不已乃計口授糧除荆榛建堂廡治書室并文廟倉庫而新之於是到石泉任記重建公廨紀事重建石泉縣文廟碑文非隱齋落成序數篇皆

傳誦於時治泉六載卒於官士民哭之哀臺臬廉得其清苦狀厚賻而遣歸葬焉所著擬上封事擬上銓府書教養論皆救時經濟鑿鑿可行者有東海遊艸燕帆紀事蜀吟石紐集非隱齋偶集數種

蜀中弔古 有引

去鄉萬里遊蜀三年每開卷則友古人愧乏雪車之句或登山而懷舊事能無猿鶴之悲筆驛觴亭慕遺風於巴國笮橋錦里攬勝跡于梁州荔枝樓上憶香山高風如

接味諫軒頭思魯直逸興翩來迺至草閣
魚城故蹤雲散以及琴臺葢宅麗質烟消
繫心不盡追維觸目具堪憑弔豈無異聞
足採寧略而勿傳苟其大節有虧雖才而
弗錄故曬經留古多標荒誕之辭而載酒
探竒不救美新之失如彼南山蒼蔚免入
譏評凡茲西土榛苓輒深洄源庶幾破倦
遊之歎息聊以代登岳之長謠

杜宇

古蜀主也

是誰鑿蜀道遂今天可至開峽有鼈靈厥功傳
鼈民迺獲陸處勿復長蛇避受禪旣云宜豈尚抱
慚愧胡爲化怨鳥當春叫紅淚不若留渾沌且以
還天地名利所弗爭縱險亦如易山川何容心古
人實多事

尹吉甫

周宣王時江陽人

中興第一流策命憲文武赫然薄伐功哀周闢舊
土不無白璧瑕嫡子遭私怒傷心操履霜千載少
慈父

長弘

周敬王大夫

大夫死無罪人宗或淪喪禮崩刑復失嗣王安所
仰忠魂不可招碧血千秋葬

文翁

漢蜀郡太守

漢世崇儒術文景稱頡頏石渠與白虎經學後前
昌獨有化俗功藝苑知翺翔三巴變齊魯唐宋遙
相望蘇季曠世才異代摘天章公實振興首蜀士
安能忘

司馬相如

漢景帝時成都人

少年學書劍意氣頗沉雄方其未得志病免亦已
窮獻賦動至尊策名金華中持簡諭父老指顧定
唐蒙建節復乘傳縣官走匆匆弩矢塞郊野一時
誰比隆從茲西南境遂與邛笮通還報賦大人飄
飄疑凌空天子真愛才詎以客遊終茂陵多著述
鬢影看春風

張綱

漢張皓子少明經學仕為御史彭山人

不愧立班心寧甘學卷舌埋輪止都亭稜稜振風
節豺狼骨已寒舉朝欽壯烈單騎諭嬰壘廣陵刃

未血將軍誠跋扈喬固死縲紲公獨免中傷於此
見豪杰七侯六貴人終亦遭誅滅封事十五言直
殺千古絕

諸葛亮

後漢時領益州牧

我思王佐才望古起遙集慷慨隆中吟高風尚可
挹出本救蒼生一手漢鼎執嘗自校簿書為政日
不給矯俗貴嚴峻肆赦弗輕襲刑平死者甘法當
廢者泣惟其心如秤所以誅罰立亮語也自足方伊
呂管樂詎能及遺恨在千秋渭濱反旗入盡瘁死

繼之掩卷空嗚咽

李白

唐玄宗時翰林學士彰明人

康山產醉聖夢星寧偶然應召稱供奉賦才壓群
賢立進清平調天子空見憐落拓江湖外斗酒驚
百篇舉世直欲殺李璘獨拳拳名山藉揮斤夜郎
終放還

韋臯

唐貞元初西川節度使

有唐奇男子秉鉞貞元初鎮蜀二十年禍亂能手
除破敵五十萬功烈為何如拊士務愛民人廼獲

安居矢志奠宗社遠上監國書大節既侃侃功名
皆其餘見者拜遺像何怪淚霑裾

李德裕

唐太和中成都尹西川節度使

生平建大業竭忠謀公府初獻丹宸箴曾持淞西
斧再上籌邊樓講習皆桑土南詔不敢窺款關還
俘擄維州殺降人深切公咻喚臂指聯河朔澤潞
唾手取憂勤歷四朝牛李別門戶傷哉去海濱國
事歎靡監誰將中原民更被相公雨

趙抃

宋英宗時益州路轉運使再知成都府西安人

治道尚寬恕民迺不忍欺此心本無媿何妨告帝
知孤高共誰許祇餘琴鶴隨允矣人中表清白久

遺

韓魏公稱閱道
為人中表儀

蘇軾

宋神宗朝舉制科累官至兵部尚書眉州人

天實生偉人豈因眉山秀世風日儂薄誕公亦云
救經濟為文章煌煌映列宿一時宰執賢罕能出
公右振筆驅經史直令名山壽詩學得曹劉一洗
鉛華舊時政論得失當陞三言奏免役敢力爭忠
讜實希觀才高忌者多飛語易為售黃州坐詩禍

黨碑樹元祐策士規獨斷武林遂出守太行送征
 鞍僕僕海上走所入嘆不合已知事大謬捧腹笑
 朝雲温女死邂逅當年多鬚眉見落裙釵後寧必
 合時宜英毅千古留

文同

宋時舉進士遷太常博士集賢校理梓潼人

雁門海岱士操行冠儒林瀟洒出塵表皎皎雪月
 襟文潞公云與可襟懷瀟洒如晴雪秋月墨竹妙天下古篆工摹臨曠致輕
 綠綬時寄篔簹吟陵洋昭慶間丹淵集清音素交
 不可復公獨懷盍簪慙送朋友藥言何情深患

難欲相保迺見古人心

胡壽安

明永樂間知新繁縣

作令最早早想公亦其偶既高於陵風何如卧畝
 畝治圃尋常事烏足為公取意公茹淡心生平隨
 處有蕭蕭一囊書濯濯五株柳人呼菜知縣三字
 傳不朽

落魄僊

嘗賣藥於梓州市

業已證仙班胡為稱落魄不獨貴尸解精氣亦須
 滅溷跡城市中凡子詎能別授餌皆夙緣化龍真

奇絕昔聞唐公房飛昇鷄犬挈社君未易腸棄之
爲不潔因嘆舉世間何物非饕餮恨無太上丹消
其利名熱注心繫三清塵土視一切賣藥人不來
此市但空設

薛濤 唐名妓

兒家在何處聞說萬里橋水國蒹葭詞鸞戕十樣
描風流女相如芳魂詎可邀試看花潭水紅泪傾
輭綃

笈索橋

橋在石泉縣南門外織竹爲索凡十股粗
尺餘長可五十丈兩岸以巨石爲紐復造
閣其上鎮之中鋪葛藤少許下瞰飛流不
啻懸身千尺崖上土人往來如平地余初
履之弗禁股栗使兩人翼而行猶顛顛欲
墮昔大蘇謂能置身危地者必能殺人予
自顧不子厚若也

長綆貫修崖空中御風走海童鞭秦橋雀步同馭
朽人路本貼危禍福惟所取安得崑崙柱中流握

吾手

蜀國絃

一撥一敲秋心手細于髮雲際落鶯啞耳感清以
越危柱間促管哀響成恍惚獨雁夜叫群沙鷄寒
泣月連延或悠颺商調應指發別情欲沾臆摘阮
思難竭頽綠辭風驚老紅怨芳歇隴頭歌流水掩
袂動心骨

移竹

空庭誰爲伴搖風宜碧篠雨餘鋤南山移春荒院

小寫月到踈檀天帚入雲掃欹枕聽清敲弄影落
烟烏日夕報平安冀成上畚蚤露滋長犢角柔青
始嫋嫋慎勿叅版師致令龍孫少

董父豢龍處

聞喜縣東四十里

於戲帝澤何深長蒼梧已成白雲鄉當時得人治
神物遂能福世綿無疆我来桐邑城東野美陂泱
泱大麓下相傳皆曰豢龍區特賜姓名董父者董
父好龍真足竒嗜欲飲食求其宜擾畜復能馴厥
性以故神龍多歸之虞皇天縱具英識封諸醴川

俾世食四千餘年霖雨心端爲斯民重稼穡嗚呼
姚華難再逢空存大壑無真龍絳郊或見祇爲怪
時門曾關慮終凶所幸留茲一泓水歲歲猶然助
秉耒颺叔有子遭盛時廟貌千秋故應爾

代悲白頭嫗

臯月廿六日舟泊淮陰

偃卧邗關十日多輕裝瑟瑟過淮河河上清風一
帆滿舟中老嫗雙髻蟠老嫗自言有二子長年弄
舸淮河裡大者承顏小者隨景雖衰暮猶堪喜自
從人各有妻兒冷暖一身曾着誰欲去不忍留半

强笑笑無告將安之人生子嬾樂懽聚何獨而今
只覺苦細思骨月本寃親坐對孤篷淚如雨吁嗟
人子有母廼有身此身之自弗恤將何親有母而
在不若死痛殺吾儕陟屺人

南郊行

南郊行南郊靜雲爲籬籬山作屏野竹香侵客衣
冷碧空盼斷來鴻影知希豈獨昔年虞遊薄堪羞
今日邗江水泝泝艸芊芊薔紅五月飛寒烟雒鵠
雙散去翩翩塗睛萬里人未還

雒鵠伯勞也以其目脂和人乳研勻點睛可見烟霄之外

手挽藤花上石壁長想青溪白壘邊

王子旭青劉子介繁澗別垂二十年邂逅於

東昌舟次話舊感賦

不記何時別相逢話正長孤樽聽夜雨小艇納微涼故舊多零落乾坤半海桑中年易感慨况復在他鄉

過雁子河

漲痕纔欲落買渡過青灣一葉飄烟水殘虹掛斷山榜人乘浪慣估客歎途艱雁子知何處西飛猶

未還

秋影

已見天光淡偏宜水氣清雁從雲外落人向鏡中行碧宙星初動金河斗半橫娥池飛素月笑弄逐波生

久客次黃州牧韻

歲行且欲盡遊子念三餘親老家山遠官寒故鬻踈年年因病卧日日併秋居風雪蕭寥甚遑思灞上驢

咏茉莉

離離清影靜無塵國色從教絕比倫
 嗅去祇疑香在玉看來真覺淡於人
 素馨種裡仙家品聯縞亭中倩女身
熊嬪嘗月夜露袒坐梨花下元帝見其身與梨花一色因名其亭曰聯縞
 粉黛六宮何足羨定須佛國結為鄰

晚望

對面看山山却無茫茫烟水滿平蕪
 半生蕭瑟哀庾賦幾月窮愁哭阮途
 活活河流千里漲瀟瀟野店一燈孤
 可憐秋夜誰為伴身在秦關夢入吳

山莊偶成

馳驅一載餘鞅塵嗟鹿鹿一自入深山
 宿夜抱雲

題所作畫

遙遙一水歸晴壑歷歷雙峰入草樓
 自是纖塵飛不到何人肯向此中休

白水道中即事

塞上春風覺更賒立春十日見桃花
 桃花開處思桃葉一夜曾歸萬里家

張士枋

士枋字魯望松郡學廩貢生原名熙雍正間以與大惡者同名具呈督學使者改今名家傳孝友賦性溫醇生平無疾言遽色內外化之朋友信之學者視爲楷模其八分書以孝正金先生爲宗晚年傳其筆法於門生席夔

冬杪偕上洋周斐若遊林屋

好山日在望欲往誰結伴茲來催臘鼓寒巖景色換杖策扣洞府瑶草尚覆岸攀援陟危岫殘雪屐

齒散象王久蹲伏龍卧山南斫尚有無礙庵結茅在山半老僧塔下迎烹茶置几案丙洞及暘谷指點尋巖畔風日大晴好登臨豈所憚憶昔戊寅歲僕被寄山館星霜已十易世事傳舍看師友半凋零振觸發長嘆古今一俯仰何用留墨翰

綠鳩啼徹黃梅兩岸水無需桔槔具園丁曉起整

簑衣共騎秧馬插秧去西陌東阡碧浪堆繞田蛙鼓爭喧颺溪頭小立未移步却值前山雨又來

包山寺題山立未遠志味對前山雨又來

夾徑穿松竹禪栖問野樵未須入空翠寺有空翠閣最勝且

自坐溪橋山勢到門繞泉聲帶雪消已知春信到

梅蕊綻寒條

新秋雜興存一

藿監風味笑儒酸好景當頭俯仰寬庭樹露濃花

氣濕井梧風老葉散乾世情冷暖知心少人事盈

虛適意難須識此中消息理閒愁何用上眉端

長圻探梅

一白千山失曉青冰魂雪魄自冥冥微風小艇清

晨出泛得寒香滿洞庭

張尚絢

尚絢字素中業儒而以青鳥術行於湖山間善說

詩遇有感觸借題為遊戲之文如原筆俗解虎邱

乞等篇皆為世所稱有耦耕集碧梧軒集二卷

喜晴

晦冥十日餘竹響雨聲共朝來天氣清晴光入鳥

哢巖雲忽滿前冉冉仍歸棟試看湖外山新沐烟

七十二峯

東山

卷七十一

鬟衆峰藏龍女祠樹隱靈威洞農歌處處聞帆影
尊前動風景愜幽情閒將枯筆弄小詩取次成揮
洒氣豪縱筆畀無陰晴南畝以時種先生雖不出
敢謂晴無用

包山行

洞庭遠接神仙宅水色霞光連漢碧西有包山露
翠微洞門花落無人跡當年銷夏建梧宮水檻涼
生一葉風歌罷采蓮歸去晚錦帆斜掛夕陽紅一
朝人去清江曲宮址春餘芳艸綠明月灣頭度彩

雲樵歌漁唱教相續玉柱金庭千古闕毛壇春暖
花飛雨葛洪井畔野棠開石公山下波濤巨由來
竒跡歷千秋卜築層巖路阻修俯仰不知時序去
數教長嘯白雲留

輓蔣子方

人生歲月如奔電桑田滄海頃臾變窮達難移志
士心畫圖每想幽人面縹緲峰高靈氣鍾耆舊如
公真罕見三徑家風守一經譽重文壇誰不羨青
鬢曾思躍鳳池白頭轉痛看龍戰童子渾忘漢臘

移漁人只愛桃花岸

與徐侯齋先生稱莫逆
鼎革後遂隱避不出

抵排異學障

狂瀾晦跡毛壇栖絕爨浮生塵世本如漚何須名
震金華殿昨夜江南隕少微從此山中失文獻竹
徑烟迷曉月寒清江水咽秋雲濺千秋猶自仰高
踪緬想遺風淚如霰震川萬頃瀉餘哀素心已遂
先生願

次韵答周同齋

病驥休懷千里心自甘老大卧長林雨拋短劍花
疑繡塵壓殘編蠹啣深酒熟帶泥封小甕香清和

月抱孤琴閒居更喜當初夏時有黃鸝送好音

五十初度

知非知命兩茫然慚媿浮生五十年歲月半消書
卷裡行藏止在水山前逢花不覺添詩興遇酒還
須了醉緣擬洗昔時塵面目一泓清貯石澗泉
初度何勞頌月恒簷端喜見一鈎橫綠抽蕉葉疑
鸞東韵起松濤代鳳笙白首墮篋尤慰意青雲桃
李轉多情炎涼莫問當清夏新試荷衣稱體輕
敢云衰懶輟耕耘盡日為農四體勤壯不如人奚

足畏老猶故我尚無聞傳家剩有窻前艸贈客難
分嶺上雲蕙帳不空猿鶴靜他年應免北山文
欲乞仙家却老方飛仙難挾寄徜徉素封虛擬三
千橘淡薄誠希八百桑邱壑怡情思靖節雪霜催
鬢老馮唐良朋不用春醪祝如水交情味更長

串月 有引

月色如銀湖光似練鷗邊綠漲蟾影共水
族交馳萍末風生桂枝與浪花相送行春
橋畔玉鏡重重范石湖邊冰輪疊疊此串

月所由名也惜乎前人未及詠物獨遺某
也因病得閒緣愁覓句深慚下里用博陽
春庶幾增韵事於騷壇傳良辰於佳什

月印澄波漾綠蘋素輝如練接芳津匣開鮫室千
重鏡風走雷車萬箇輪如貫不愁蟾影亂相聯偏
愛玉盤勻青蓮此際應難捉一串牟尼採洛神

王奕仁

奕仁字魯公號志山占籍華亭康熙辛卯舉於鄉
癸巳成進士選庶吉士授編修辛丑會試同考官

歷充尚書館三朝國史館省方盛典萬壽盛典纂
修官雍正甲辰督學黔中振恤孤寒教養備至請
增廣弟子員額許苗人子弟入義學歲科試量取
以示勸隸五開銅鼓二衛於黎平俾治弗界楚絕
兩籍弊䟽上皆報可黔人士愛之如父母丙午晉
詹事府左春坊左贊善加一級任滿當代

上

廉知公清慎

命再任三年當是時太夫人在堂

年已七十有九矣乃陳情拜疏乞歸終養得

俞旨丁未冬抵里門蓋母子之不面者七年矣明年

省墓於山中又踰年卒遺命歸葬於寒山之下焦
廣期先生誌其墓銘曰出則勞臣處爲孺子君親
所求如斯而已

飛雲巖

九天落竒峰倒插黔江側朶朶雲肖形葉葉雲呈
色龍蛇紛攫拏鬼魅森跳躑如蓋蔽千人如幢豎
萬尺上裊凌青霄下蔭賽廣宅一龕佛火明燦然
耀圭壁四面盡竒觀危亭起峭壁由巖復登亭盤
屈歷險仄苔滑草不芟步窘徑愈窄蝸鼠同繚繞

猿鳥偕攀陟亭中揖獅座相望分主客左懸瀑布
長右轟蒼官直飛流注田中孤根蟠石隙俯仰有
竒趣嘆賞殊自得拾級下層巒方塘水湜湜琳宮
數百弓老僧如舊識留客茗荈香對景心神適回
想卅年來耳聞及身歷落伽海外峰燕子江頭石
視此定何如恐無此絕特會當拾茅茨結廬茲山
僻餐霞朝露清采藥靈芝碧豁然襟期開超然利
名釋烏能久局促俯首困轅軛

踰辰龍關

巨靈手揮一片石高插巒荒黔楚隔鳥飛不過猿
猱愁邃古曾無往來跡後王有事西南夷高山却
遣五丁闢頑石堆中一線通日光不到石乳滴一
夫守此却萬夫巖關自昔拒大敵時平嶺上少烽
烟策馬牽車人絡繹我來正值初夏時萬木陰森
晝昏黑肩輿遙指崔巍中僕夫惴惴勞登陟入關
身在兩崖間自上直下驚魂魄峭壁摩挲題咏多
驅馳未得停游屐使旋他日過山頭應把新詩巖
畔勒

謁諸葛武侯祠

牂牁分野屬參井古為梁益之邊境鬼方伐後終
強梁莊嶠通來尚頑梗自從丞相奮南征蠻王濟
火率先迎披荆斬棘滇池遠策勲加爵羅甸榮

南征

以濟火為先鋒封羅甸國王即
水西安氏之始祖今配享祠中

百蠻屏息歸王化銅鼓

高震夷夏至今夜郎千里間春秋競走祠堂下富

水之北貴山陽綵虹高跨流湯湯選茲名勝安俎

豆頂禮人持一瓣香鯁生來此三年久訪求遺跡

仰山斗今朝入廟肅衣冠恰逢戊祭羅尊白華燭

明膏牲醴全綸巾羽扇尚依然出師兩表堪垂涕

躬雖盡瘁祠永傳鄴臺銅雀久荒廢天塹長江一

葦濟滄桑日月幾更移只有先生名不替天生賢

哲與奸雄一時伸屈隨遭逢是非論定百世後富

貴浮雲轉眼空我師先生真氣節出處不苟忠誠

竭薄田幾頃桑幾株將相之中誰得埒黔江流共

蜀江深功在西南照古今風吹古柏發清響如和

當年梁父吟

不長籠鳥

不是能言鳥偏工宛轉啼幾教清可聽萬里遠相
 携眉細真如翠衣鮮欲賽鸚雕籠隨桂楫莫厭窮
 蓬低

酬張月槎

張雲南人由史臣出守河南

鳳池華硯未全荒擬向南天闢講堂敷教自應先
 禮樂起衰不獨在文章惟將忠蓋酬主明主敢以
 顛蒙鄙互鄉晝錦他年君過處還期公論訪黔陽
 除夜思親
 極目吳雲各一天每懷雪鬢涕潸然十年京國還

鄉夢萬里黔山陟岵篇宦况如冰冬更冷客愁似
 海夜空煎自憐縮地曾無術難奉辛盤到膝前

山行有感

秃盡青山無柳枝東風終日雨絲絲身經百嶂千
 峰裡心怯泥深石滑時一歲總成行路客三春半
 寫紀程詩坦途世上由来少叱馭王尊是我師

冰葉

西風如剪雨如繒一夜裁成葉葉冰照眼忽驚珠
 滿樹脫胎新剥玉千層不關雕琢纔相肖但覺輕

勻得未曾自是化工羞刻楮瓊枝片片曉光澄

歸舟偶述

附贅懸瘤歷四年蠻爭蝸鬪總紛然羞依門戶營
三窟愛情風帆剪百川桂楫合隨鷗鷺隊萊衣不
結市朝緣南陔一曲歌還泣敢謂清時畫錦旋

生朝遣興四首

雙轂天邊轉不休吾生閱歷幾春秋廿年辜負人
青眼兩月遭逢浪白頭已分水銜拋逝水更堪風
力阻歸舟箬篷江上誰爲伴楫拙爐烘一敝裘

椎魯安知口說騰論材自是百無能鷓飛甘擬身
同退蛟負常憂力不勝十載賣文剡里客三年行
脚貴山僧從今且說休官好圭組平生樂未曾

忠孝何曾判古今君親恩與海同深桑弧蓬矢

男兒願陟屺循陔游子心烏鳥微情陳魏闕清風
萬里拂華簪越江過去吳淞近好取冰魚付釜鬻
潞河別去淚沾衣欲傍慈顏夢裡歸久曠晨昏真
自誤底須五十始知非蟪蛄歲月羞稱壽冰雪殺
名不療飢一葉寒江愁萬斛青氈還仗日光輝

王金增

金增字師李號眉庵長洲縣諸生有穀黌序乾隆甲辰科闈中卷擬魁以後場字句微疵置之監臨制府查公弼納深惜之送鍾山書院肄業讀書之暇與南豐湯椿年首輯鍾山書院志制府查公爲之序其先世滌之先生文恪公兄也有栖隱之地名壑舟文恪公作記沈石田寫圖李旻楊廷和諸名公各有題咏時移世改莫莫知其處眉庵得朱氏廢園乃臨流築室顏曰壑舟以承先澤賦詩二

十章徵詞人歌詠之今冢宰陳公大受撫吳日以事至太湖居停縹緲樓覽其先世墨蹟圖畫有嘆羨焉眉庵恭兄友弟內外無間言輕財重義公私有急呼之必應死之日有聞而涕泣者

壑舟園雜詠

輞川集載名勝之地凡二十絕句茲止拈十題每賦二絕句以足其韻

壑舟 池旁作室類舫左臨清渠右蔭喬木取余租滌之公壑舟之名踵而加焉并摹先文恪所書圖冊卷端壑

舟二字作額因以名其園念先澤也

泊舟碧溪口纜繫溪邊柳不作深藏心寧爲力者

有
仰視簷楹間墨妙成三色池中亦養鷺人往情何極

得月亭

此先太傅惟道公亭名也亭在王巷湖濱吳苑
庵為賦詩載震澤編并邑志園舊有亭址高而
面山每月出山頭清光先得因移舊名名之癸亥歲雙橋
姪來過謂石橋曲水有亭翼然雅似滄浪並題曰小滄浪

先世錫嘉名恍然登玉宇月好正當頭明朝占畢

雨

蘓子樂未往檻外瞰清漪魚樂我亦樂我樂魚豈

知

縹緲樓

樓對縹緲峯俯瞰巨浸雲峰四合向為朱氏歌
舞地名流醮集無虛日吳梅村錢牧齋各賦詩

載具
區志

身疑入蓬瀛長風震濤響心怯起憑闌嵐翠集衣
上

清詞壽琬琰慨然慕前侶夕陽自滿樓歌舞歸何

所

雲津堂

堂臨曲池周遭綠蔭隔岸有巨石特立若丈人
峯者向係朱珩壁累成聞其臨卒舉斗酒酌之
作別事載足徵
集詩人小傳

堂前異峰起吸嵒鬼斧開襄陽下拜後不惜更傾

七十二峯

東山

卷七十一

杯前吳興政 庭畔覆新槐 津頭長水苔 空聞有龍躍 願得高人來

天繪閣

閣在縹緲樓之北有八咏賦其景

欲豁登臨目 行行入閣來 天工嫺繪事 面面畫圖開

畫圖終日展 可望亦可即 俯仰百變呈 雲山無舊識

留屨廊

廊隨地勢之高下逶迤宛轉上得月亭通縹緲樓壁間多古名人碑刻好古之士每摩挲不忍去

投轄留上客 何物持贈君 搦摹古石本 滿紙生烟雲

石碣何晶瑩 倒影動漣漪 我來長廊下 拂拭未忍離

培荆

池東有小軒臨流可憇索顏未得伯兄槐亭曰予讀斯干之詩室成燕飲首歌兄弟我與若賴先人緒業爰處于斯非式好無以善似續也軒之西有荆樹一株因顏曰培荆暇日必偕坐其中敘天倫樂事焉

面溜各涓涓 同源方傾瀉 孔懷老彌蕪 共醉紫荆下

荆茂欣同株 滋培厚晚歲 斗室樂融融 花萼傲庚

帝

護蘭室

子弟忍庵性耐煩劇園中量度布置悉出一人花
木無不寶護而尤愛蘭嘗曰此吾家善人花也非
種鋤之恐不速佳種護之恐未至其生平嫉惡好善亦如之作
室曰護蘭以寄子弟意

久與善人居芳馨未忍把休令寒風欺旭日紙窓

下

光風轉初汎緗葉映雕闌應嚴非種鋤滋蔓恒無

端

碧螺書屋

園適當碧螺峰下構室于園之東北隅頗僻靜
子姪輩讀書其中夜半月明敲琅琅出戶外較
絲竹嘈雜其
雅俗何如也

不寐聽讀書起來助清嘯篝火耿長宵為謝明月

照

生意寄庭花隔歲已含萼

庭有杜鵑花
故借以起興

典學貴日新

不殖虞將落

菘芸館

余不敏而好積書讀書畧觀大意不求甚解閱訖
隨手拋置恐有散佚哀而藏諸室不能取益腹笥
徒菘芸辟蠹
方自愧云

積書勝積珍書田子孫務籤軸羅琳瑯勿羨珊瑚

樹

柴關無剝啄晤言盡古人掩卷不相識枉號百城

君

天繪閣八咏

縹緲晴巒

本是虛無最上峯，分明巨浸插芙蓉。
雲旗不掩丹梯路，日觀同膺玉檢封。
檻外遠延青一帶，牕間平滉翠千重。
清秋欲豁登臨目，免得芒屨策短筇。

碧螺擁翠

結廬只合傍林邱，樹色嵐光望裏收。
谷口雲生滋薜荔，峰頭日落翳松楸。
茗茅三月初經雨，橘柚千

行未到秋坐久渾忘明月上，忽驚螺黛鏡中浮。

石公晚照

晚霞片片雜歸鴻，指點孤峰一抹紅。
休道夜光然粟石，須知暮景屬山翁。
龍門剝耀虛明錦，鰲背橫拖斷續虹。
飛閣何當臨海上，蓬萊日出破溟濛。

三山遠帆

也願乘槎到日邊，壯心空逐片帆懸。
孤岑遠混依影，弊席遙篩漠漠烟。
泛宅波心范蠡楫，登仙天際李膺船。
儂家壑裏藏舟慣，肯趁風濤上下顛。

石橋漁艇

小閣濱湖望轉賒紛紛漁艇自橫斜錦鱗伏藻頻
敲榜莘尾吹漚疾挺又青艸浪高沈罟罟綠波風
急傍蕙葭綠知每歲鱸肥日多少羈人正憶家

豸嶺歸樵

坐聽丁丁伐木音歸樵逐隊出疎林穿雲詎怯蒼
苔滑踏月方驚落葉深學步猱升綠薜荔甘心鹿
走歷崎嶇晚風吹下歌嘈切野調山腔信口吟

雙墩出月

山腰雙聳碧雲堆罇裡清輝入閣來鏡嵌佛頭螺
擁髻珠擎仙掌蚌離胎當窻咫尺銀潢接隔座依
希玉宇開自是天工位置巧漫誇勝地似瑤臺

弁山積雪

浪說瓊樓與玉京凭闌舉目最分明吳門練影兼
天淨庾嶺梅花共月清披氈慙無仙侶望泛舟空
抱故人情好憑酒力衝寒陣倒盡金罍更兕觥

此詩入韻致感感伏滄海
 天宮與落蘇秋矣凡肅然
 亦其與蘇與三京與開舉
 命三學開自吳天工
 麻等起學心學執轉
 七叔之筆墨愛其
 武峰吳定璋友篁菟錄

七十二峰足徵集卷七十二

武峰吳定璋友篁菟錄

東山邱觀利賓編訂

席三教

教字漢翔善彈琴與許紫眉稱同調布衣蔬食儼

如老禪和邃精內典而不屑機鋒鬪捷詩惟墨守

選裁安章頓句而已

此詩觀獲四歸

調飢苦長夏秋至怯風寒挈杖出蓬戶原野霜露

七十二峯

東山合編

卷七十一

繁田父方刈稻饁餉邀我冷細語耕耨力收穫亦
孔艱自慙四體逸畢竟荒游盤歲月一以逝春潦
秋傷乾西成僅獲半賦稅不暫寬凶年損恒業耗
費出無端相與長嘆息身世終摧殘

小春十三日同人集致遠山樓即事分得十

三覃韻

安居求素志爲學老彌耽折簡招同好臨文誰獨
諳寧將游末技時復縱高談情洽思投轄交新快
盍簪坐深遺百慮物外得孤探顧我無他技非能

賦雅南隕然厠群彥徒使濫沉酣

旅夜

旅夜涼生簟江城鼓角清篝燈官閣靜斷雁枕函
明月色愁中見家書夢裡成故園歸未得秋老若
爲情

詠桂招隱社集得五微

山中秋思滿叢桂隱巖扉樹出高雲古花分片月
輝坐聞香自好禪喻理仍微足慰淹留意淮南孰
可依

遇紫眉過飲景生齋頭

風雪閉門時相過非有期肯迴深巷屐來賦考槃
詩石影周簷白瓶花向盞歌陶然將日暮歸路任
委蛇

東止白上人

虛堂端坐自長年戶外山川共寂然五畝風花酣
獨夢一春浪迹等枯禪非關吐語頻驚世直使無
疑可問天擬扣巖扉談在昔茶畦烟煖溢新泉

寄許紫眉

數行頻得故人書不獨離愁問索居拙病莫教辭
凍餒衰年猶足共樵漁烟深大澤過帆盡木落連
峯度雁初旦夕相望來畎畝將歸何事更躊躕

席後沆

後沆字次文號滄池縣諸生以奏銷呈誤不復事
帖括肆力於古文辭每爲人捉刀詎諧間出或致
招尤不顧也

和葛木公書懷韵

煉藥遺洲綠未消采山釣水侶漁樵胸懷日借清

泉洗塊壘時憑濁酒澆詩就一門皆白雪社歸雙
頰上紅潮飛昇自是君家事莫認仙踪太次寥
鬢點新霜帶減圍床頭金盡故交稀姜肱友愛常
聯被范叔孤寒特解衣可與沙鷗同去住不因裘
馬羨輕肥百年過半還如昨滄海桑田事總非

賀友新婚

誰道蓬萊不可尋雲霞朗徹叩仙岑三腮寶鼎迴
文古四角珠簾繡字深窻映月華應對句華翻花
景遇知音屏間亦有雙栖鳳不及君家子夜心

深居雜興和友人韻

鳳舉鴻軒莫浪扳得逢良友且開顏主賓對景耽
清聖早晚餐霞冀大還翻覆世情隨水逝飄零詩
卷逐年刪此時自合同招隱擬向淮南賦小山
燕地何人更築臺十年伏櫪老龍媒救時雅重弘
羊策作賦誰當宋玉才恩怨未忘存血性勲名久
已絕胚胎樂飢泌水真吾事肯信黃金散復來

席永鏗

永鏗字楚章別號辛垣岸然道貌舉止安詳喜吟

詩無日不成數首子孫男女濡染家風咸能賡和
 以相娛樂孫紹雄尤秀出天不假年早卒無成悲
 哉所著有茗香集二卷葵村復稿四卷秣陵遊草
 一卷
 幽蘭吟
 幽蘭生空谷高潔莫與京春風嫁桃李此花獨抱
 貞烟霞作供養月露滋精英清芬沁詩脾玉立遠
 俗情賤夫足不履君子合締盟我來陟山阿嗅之
 醒宿醒移置傍泉石污濁無相撓尼父發猗操楚

辭歌不平詎若道邊柳朝攀夕復萌

秋夜登微香閣

傑閣橫空翠凭闌豁遠眸雲眠孤寺冷月出亂山
 秋鳥宿經三匝虫吟感百愁披襟動涼思緩步下
 林邱

舟過寶應湖

竹西歌吹地信宿又睽違雙槳長湖出孤城一水

圍臨風懷艸檄

陳琳墓在是

問俗訝珠輝

孫莘見珠光甃社湖應登第

沽酒

依村岸漁舟弄夕暉

莫愁湖

湖水盈盈處當年載莫愁
蛩聲今夕感月影舊時
秋廢址眠黃犢荒汀起
白鷗嘔啞雙槳去還向石
城頭

訪友虎邱山房

入城剛臘盡訪友到山房
背郭停殘雪孤村冷夕
陽鐘磬來古寺帆影落寒塘
相顧思疇昔徒嗟髮
髮蒼

秋夜翠峰逕

乾坤肅以靜夜壑生秋
磬月正四山出風和萬木
平上方磬朗發古澗泉幽
鳴來此憇寂寞深得山
水情

小閣即事

几簟涼生醒倦眸
斷雲疎雨識高秋
一湖雪浪奔騰起
幾點螺峰淺淡浮
山寺烟消孤月上
漁舟風急亂帆收
窓光一隙寬如許
差抵元龍百尺樓

江上有懷寄陳虎文

獵騎呼鷹玉粒肥
寒蘆葉戰雁初飛
樹磬故惱他

鄉夢虫語如催久客歸露冷秋江晨拂杵月明西
閣夜裁衣數行封裹憑雙翼一字相思一泪揮

客夜有懷家季韓光九成

微茫雲月現漁缸感得新愁欲滿腔烏兔無情物
換幾關河不禁雁來雙郵程人老西風棹故里花
寒雨夜窗惆悵衰翁獨飄泊鵲鴿吟罷嘯秋江

秋夜寄翁山人湘中

海棠花下逢君飲芍藥欄前唱渭城楚水羈情詩
可述吳山別恨夢難平波翻彭蠡天無際秋到匡

廬月正明此日潯陽江上客郵亭曾否計歸程

秋雁

蘆花如雪映寒潭雁字行行寫二三萬里家鄉書
未寄不勝秋思滿江南

秋蛩

涼宵露白夜缸紅蟋蟀聲殺出艸叢祇怕杼空驚
嬾婦至今勤嗇頌唐風

席紹雄

紹雄字上飛辛垣之孫資性絕倫詩文信手而成

皆落落自異時有神童之目卒年二十有三著筠溪稿一卷

金紫瑞表叔擬廣連珠四首詞意激楚因效其體用以解嘲

蓋聞炎涼成習世固如斯貧賤與悲僕猶若此是以拒賓張纘快然殘客之難容罷將廉頗痛矣交情之如市

蓋聞是非有定十載方知貧富何常百年難恃是知郭家豪貴當年金穴尚存乎鄧氏驕奢昔日銅

山今已矣

蓋聞從來豪傑半出風塵自古英雄多由微賤是以吹簫伍子還須樹節于東吳乞食王孫終得稱孤于南面

蓋聞雄心未冷終奮青雲壯志須伸寧辭白首是以無財可耀十三謝客亦何妨有筆堪投萬里封侯還自取

古意

妾家鬱金堂雙雙栖海燕何事玉關人不憶桃花

面洞庭春色深紫塞軍容練寂寞晚粧慵却倚闌
干徧

席錢巖

巖字大臨康熙甲午科舉人孝友溫恭讀書自好
與人言辭氣卑弱藹然可親恃才矜名之輩望而
却走也

依綠園社集分得園字

相逢都勝友雅集並西園過雨毫初潤臨風紙欲
翻閣虛延野色樹豁見漁村獨愧巴人曲難同白

雪論

席玕

玕字貢珍別號貢湖太僕之裔孝弟醇謹友誼真
摯登康熙辛卯賢書延名師課諸子俾各執一經
以應試哀集東西兩山諸名家詩十有六卷名曰
湖山靈秀集所著摠懷藁一卷同年杜雲川太史
序以行世

夏日琢山見訪用少陵韻貽詩勉和

吾懶君多病鍵戶少出遊居處可相望高樹遮層

樓南北不數武造訪如羊求論文同尊酒猶念此
樂不在昔陪硯席健筆超輩流雷電出雙腕風濤
撼高秋今茲結騷壇密幄紅翠稠松梧扇坐涼溽
暑逾清幽勞君蹒跚步來此少遲留且爲觴詠歡
勿作築室謀

寒蟲篇

百年雖長要有終

東坡句

達人肯受煩憂攻儒冠悞

盡少年輩殫心翰墨求其工引錐刺股良自苦欲
與造化爭窮通命蹇空研案頭鐵時來已焦爨下

桐豈知仕路更傾仄劇驂九折迷橫縱獲君信友
竟無術鬱鬱烈火燔五中不啻蹶蹄受羈勒爭及
病翩辭樊籠樂吾性天適吾志安用纓組纏厥躬
日不營求夜無夢癡兒一任啼門東君不見王侯
里第車馬轟青青旋拱北邙松繁華消歇一轉瞬
草頭之露日下濃我欲訪道尋崆峒神仙之事非
欺儂爐中鉛汞資玄功盛年不再難希蹤試聽屋
上號寒蟲得過且過將毋同

春雪

春雪忽霏霏餘寒已歛威積來鴛瓦薄霑向鳳樓
稀似約梅花放還爭柳絮飛何人歌郢曲高調出
柴扉

過葛軼凡園題贈

幽人闢佳境結構復天然竹木消塵慮禽魚結淨
緣栽花依恠石瀹茗引甘泉小阜堪憑眺湖山滿
目前

贈別葉淇園鍊師

丹臺舊註名鶴骨獨竚岵採藥經三島開山役五

丁晝眠雲繞榻夜坐月盈庭惆悵携琴返梅花壓
戶扁

過高峰寺訪陸公榮遺詩不獲遂登白豸嶺

至湖沙

徑僻兼逢仄林深又隔灣尋幽忘地遠訪古遠心
閒落木風號野流泉雨過山松脂粘屐滑楓葉染
衣斑持鉢僧朝出携琴客暮還名流遺片石佳句
落塵寰興盡何堪駐峰高尚可攀披茸穿木末拾
級出雲間野水菱蒲亂平沙雁鷺環回看吟嘯處

丹翠鎖孱顏

冬暮携酒登山夜分始歸次翁式金韵
壺榼相攜入翠微夜寒深坐各依依山腰月落老
猿嘯松頂露濃孤鶴歸煮雪茶甘甌屢涸探梅句
好筆爭飛相逢勝友成佳會不放傷心淚濕衣

寒月

滿意冰輪出太清愛臨寒夜玩分明雪光凍合踈
梅影霜氣衝回落雁教思婦城南長笛怨征人塞
北大刀情莫容點滓纖埃起不得憑樓望玉京

次韵答同年程斗文

投足何堪盡畏途祇緣身計誤爲儒求仙未敢尋
三島謀隱聊應托五湖風翻摩空看俊鶻霜蹄下
坂識名駒元龍豪氣何曾減笑我烟波狎釣徒
欵歲探春不厭忙早逢人日好風光蔬芽爭逐仙
莫放柳線猶輸綵縷長弄舌鶯雛將試巧衝寒梅
葢漸舒香多君吟興從今始例有新詩寄草堂

敢誇搖筆氣如虹識字何如學挽弓我自在郊同
棄馬誰能聞爨出焦桐交遊零落綠金盡魂晷消
磨仗酒功幸有薄田聊自給扣門辭拙免西東
西泠懷古
天意不教戡宋難孤忠容易殄強金權臣猜忌功
難立庸主偷安寇實深北寺漫冤三字獄南枝猶
表九原心到來祠墓餘悲慨誰使神州竟陸沉
土木蒙塵倉猝中奠安社稷實惟公南宮爭敘奪
門績北狩誰論守土功信史終難泯大節豐碑還

爲表遺忠英靈異代胥瞻仰武穆爲隣感慨同

喜金天士過訪

一水衡門想朔洞忽逢蠟屐冒寒來厨餘夏槁難
充饌甕拆春醪易舉盃每貸酒籌思避席未償詩
債欲登臺莫忘改歲圖良會選勝湖山飽看梅

宋謹涵招赴同年雅會賦呈諸子

五湖烟月獨行吟緬想群賢感慨深踪跡浮雲多
聚散功名流水易升沉披襟本叶金蘭契割臂重
堅縞紵心放浪形骸師痛飲敢將簞笠傲纓簪

江景初招同宋謹涵陪雲間朱旦平酌疊前
韻

重來池館共聯吟春水盈盈一望深滿引芳樽慚
小戶苦無佳句費思沉攀花夙擅揆天手視艸猶
懸向日心獨有盛名喧海內何妨白髮戴華簪

小雲臺晚眺

緩循梯登上層巒一展湖山眼界寬恠石倚巖驚
獸立老松欹壑似蛟蟠烟屯平楚千村晚月浸澄
波萬境寒值得雲臺振衣客丹青併入畫圖看

浙行

綠桂飄香八月秋吳山越水豁雙眸功名已屬兒
曹事西子湖頭作勝遊

寓樓

高樓百尺俯清流樓外群山爽氣浮濟勝不勞登
頓力四圍秋色望中收

席王芳

王芳字采若貢湖次子歲貢生

和東園柳枝詞

七十二峯

東山

卷七十二

滿園紅紫艷陽時偏是鍾情在柳枝一葉蟬翳藏
 不見令人笑煞愷之癡
 鎖烟籠雨翠眉開腸斷征人不復來風起桃花共
 飄蕩好尋劉阮去天台

席陸菀

陸菀字叔旆貢湖三子占籍浙江中雍正己酉科
 舉人

涵空閣

高閣寄山巔乘秋過竹邊晴開千里色曉動萬家

烟野鶴雲中友疎鐘世外緣遠峰無限好雲氣吐
 青蓮

登君山

君山留勝蹟短策探幽遐浮遠堂得奇境晴江帶
 淺沙欲尋黃歇墓難得野人家祇有遺碑在摩抄
 起嘆嗟

蜀人繪萬里省親圖贈蔡君卧子題後二絕

中郎年少蜀江遊三峽風濤一葉舟西指官衙心
 似鐵杜鵑啼煞不回頭

猶汨沒妙在靈動時嫵媚而質直水則有妍皮山則無癡骨楚風莫能淫粗悍為斂色越洞庭而南實不可多得泊舟當暮時群動方嚮息餘霞斂晴波魚梭亂如織策杖踞層岩寒翠粘衣舄積水浮太空群山倒垂笏娟娟秀可餐愛此莫能釋為之鼓瑤琴流響入空碧

觀音巖精舍小憩

巖以險則竒嵌空而突起高高者天耶其勢竟相倚日星避其鋒烟霞生杖底仙家有與區所以藏

靈髓玲瓏萬竅通微茫一柱砥瀨氣涵古今清光渾遐邇蓬瀛不可知可知者此耳一罅自天開巨壑難措指絕無斧鑿痕混沌留種子中有大士像趺坐青蓮蕊將無憫濁世垂目不忍視左象右青獅或拜或長跪其傍有精廬編竹辟荒枳深徑上噴岼苔濃不受屣蟻盤足並胸蛇行腹代趾衣沾薜荔香鬚染雲霞紫竭蹶竟躋扳餘怖猶未止策杖采新蕨淪茗烹芳芷開軒俯清流枯坐觀無始湛湛者為天沄沄者為水天水靜相依禪心洵如

是出香然天云云香然水天水精脉外華山向地
林泉永興舟中烹茶並開神神然林坐膝無故
柳陽竒在怒神勇不可制突如其來如不知其所
自雲出石欲飛霧鎖山仍閉越永興而西突兀尤
足異或如虎負嵎或如鵬展翅或如星麗天或如
雲委地或免胄而趨或帶甲而戲或箕踞不恭或
偃僂自廢又或如神龍出海波濤沸騰空天馬飛
造父不敢覩高者插層霄末腫而根細今古絕躋
攀日月停輪馭鳥飛莫能窺猿掛無從遁惟有雪

寒松無根而自繫冷然冰雪姿翩翩有仙意怒瀑
挂長虹珠玉相連綴交厓一線通魚貫舟相繼
鼉向人啼青春死陰翳乍見神欲迷深入心轉悸
爾既不善游何由到靈闕古來山水人性情有默契
靜以挹其神淡以平其氣淵然太古懷五岳蟠胸
際一杖入雲峰高深失所據矧茲掌大石敢擾我
神智舉袖拂烟雲寒岩墮蒼翠紛紛滿衣烏用以
清寤寐

游僊山

有仙山則名靈境自瀟洒出郭訪崔嵬曲屈隨青
野飛泉左右逢天半松濤瀉白鹿杳難尋其洞頗
閒雅直上破青冥荒祠餘碧瓦仙人去不回雞犬
雲中寡山本不甚高衆山反在下柳城一點烟氤
氳蔽野馬曠懷空古今况此骷髏假奚為戀微名
雞肋不忍舍長歌下山來老淚空盈把

戊寅春日自湘至柳途中作

吳儂生長本邱壑七十二峰雲漠漠中有鴻蒙真
氣藏采芝種朮殊堪樂奚為碌碌困風塵不肯安

貧守耕鑿去秋載泛估人航懸壺星市傷堯堉
足侯門漫自誇昂藏七尺為人縛牛馬奔馳歲月
徂俛仰不堪留愧怍朝來鵲噪報新霽有命柳陽
自鈴閣水麓洲前理舊帆詩脾重把清流沃是日
看山眼倍青青山愛我亦如昨晚泊潭洲訪故人
燒燈置酒傾杯酌酒酣拂袖便移舟曉起推窻見
衡岳名山自不同培塿體勢尊巖氣渾噩祝融紫
蓋遙相望日星蕩漾互回薄須臾膚寸白雲生失
去岫嶺峰半角扳躋未及歷崔嵬又向衡陽訪花

萼石鼓峰前水合流
烝湘左右分清濁
形勝西南據上游
湖山百二連城郭
豈知在德不在險
戎衣一着臬元惡
何如山上七賢祠
萬古宗風開聖學
朱陵洞口草萋萋
回雁峰前花灼灼
燕子初從海上歸
柳綿已向風中落
憑將舴艫溯溪流
盡檢高深入囊橐
計程明日到郴州
仙山髣髴芙蓉削
橘井淒清在也無
杜陵荒塚誰堪托
留連往事不勝情
夜宿荒塘抱山脚
一曲滄浪靜有餘
烟村微茫混寥廓
回瀾激月盪崩厓
噌吰響應疑天樂
於焉抱膝坐宵分
收斂神情歸寂寞
不但窮愁不敢侵
熱中至此亦蕭索
始知移情在山水
還家須救斷家事
多耳芒鞋折角巾
來往千山萬山裡

宜山草堂歌為鎮將王文安作

將軍氣度何閒寂
上馬揮戈下草檄
輕裘緩帶自翩翩
殊異乎射生格殺之
惡習生不逢時負虎頭
難將談笑覓封侯
洗兵魚海天山定
戢矢跋弓春復秋
秋去春來自有情
草堂構得兩三楹
墻留圓洞看山入
池鑿芳塘受月明
斑竹湘簾花木凡不

事喧囂絕綺靡琴劍尊彝古器陳蕭然高寄圖書
裏武將能文聲籍籍班荆而語傾疇昔自媿山阿
散髮人敢辱將軍稱揖客開君桃李園坐我草堂
之南軒當堦紅藥影翩翩下君翡翠床卧我草堂
之北窓尋巢紫燕語雙雙草堂飲我東西序剪韭
烹葵佐雞黍芙蓉別墅劈紅箋楊柳迴廊題白苧
竟日携尊醉夕陽留髡卜夜更飛觴霜刀膾鯉銀
絲細雪盃承漿玉露香勝會難逢纔信宿驪駒又
唱宜山麓雅量多君重旅人乞我草堂留一曲鳴

呼男兒不文當學武手提三尺逐猛虎功成絕口
不言兵悠悠噲等羞為伍閒情偶托辟疆園花木
扶疎手自搴美酒開筵三百盞竒書涉筆五千言
八憲窈窕敞玲瓏坐我春風卧落紅安得抱琴常
載酒從君問字草堂中筠屋松軒薜荔窩池中蓮
葉貼青簑帘外峰巒湧碧螺寢食琴書嘯且哦聖
世優游奈樂何壯心未改髩毛皤猶能力挽魯陽
戈安不忘危知也未英雄有骨莫蹉跎

為曹淳也題邃園

曹子讀書識所守結納常傾天下友浮湘三度訪
柴荆蕭疎四壁留蚪蚪今春挾我郴江走處處晴
光媚花柳家住仙人橘井傍綠水青山環左右登
堂携手略寒暄床頭斗酒謀諸婦斯須雞黍雜園
蔬花下藏閨角竒偶彈紅子夜剔殘燈浮白芳辰
剪新韭酒酣耳熱縱談鋒抵掌古今逾八九時而
落腕洒珠璣不覺清風生兩肘朝來示我邃園吟
筆墨空靈豁心手英英寶氣五雲蒸上徹層霄貫
珠斗急呼南岳白雲封同勒岫嶺垂不朽

月夜寄內

已是還家月仍從客路看清輝憐此夕孤影憶當
年零露濃秋草澄河澹遠天砧聲何切切吹夢落
愁邊

夜泊

夜露含靈液空江靜見聞一燈初著夢萬籟各依
群遠壑迷青靄寒郊擁白雲此心清似水何用滌
塵氛

宿湖上山房

借得曹溪榻心閒夢自恬林深山氣滿石落水痕
添白月當空小青霜隨地嚴枯吟忘永夜獨坐卷
疎簾

法螺庵

百折盤螺頂層層翠掩閑俗囂人自開地僻境仍
閒花裊雲中閣鶯啼樹裡山摩娑歸去晚題遍綠
琅玕

舟夜

杳冥非人境援琴弄紫烟山留雲作海月化水為

天一葉聲初動千林籟未傳茫茫塵世內此夕扶
飛仙

金陵懷古

王氣橫霄燭斗牛龍蟠虎踞帝王州雲山此日仍
分向江漢何年始合流見說衣冠通萬國更聞日
月出重樓吾生也晚無由識觸目偏深今古愁
崑崙孤峙石頭城海岳來朝紫氣橫聖主龍飛清
絕域英雄鵲起奠神京一言覆楚山河裂三戶亡
秦天地驚莫笑南風多不競八千子弟舊橫行

可憐南渡事何如不失龜茲計已疎相業共推長
柄塵風流爭羨短轅車盈盈桃葉徵歌艷步步蓮
花出舞餘自是無心酌擊楫百年鎬洛任邱墟
鼎湖莫挽痛遺弓天險休誇百二雄一夜星芒沉
塞北千年王氣掩江東龍媒狩去金墉遠燕子歸
來玉殿空愁絕御溝河畔月霜鐘夜斷景陽宮

釣臺懷古

物色殷勤訪漢廷朝游北海暮東溟偶逢山水開
生面暫向乾坤托幻形垂釣一綸心寂寂披裘六

月跡冥冥足加帝腹渾閒事何用嘒嘒奏客星
釣得鱸魚覓舊徒紫簑青笠老江湖意中尚且忘
天子身外安知有大夫曲曲溪流秋影瘦重重嵐
翠晚痕鋪曳裾來往侯門客羞見先生不敢呼

落花

寒食江南烟火遲平橋水漲綠差差風刀已剪無
情片月斧難修有恨枝一點殘春還自惜千金良
夜不堪思疏窳杜宇空啼血叫破天闍那得知
亦知寮落已蒙塵且逐東風暫結隣下上虛空周

列子往來簾幙李夫人月明繪出羅浮夢浪暖粧
成洛浦春果是多才偏好事幻形猶自費精神

次蔣亦宣過張賓樵舊廬有感韻

亂水穿雲沸石根潺湲曾灼舊柴門可憐蝶化莊
周夢尚有鶻啼杜宇魂蛛網竹樓迷燕子烟橫苔
徑冷梧孫風流何處堪洄溯千樹梅花月一痕

江村即事

石飽江飢水不流捨舟從陸興偏幽雲霞橫巖樵
夫背桃李叢開村婦頭紫燕差池營舊壘白鷗浩

蕩沒滄洲倩言南北馳驅客換柁收疆休便休

宿靈隱寺呈湛禪師

扶筇闖入亂峰堆踏遍春光到講臺水急欲流山
影去林深時有梵音來只愁路隔仙凡杳不怕詩
成風雨催珍重遠公留說法客心久已煨寒灰

白門寒食

客舍炊烟絕淒涼入暮春可憐三月草看盡六朝
人

為夏晉民題畫

樹遠青欲來石險勢將落溪橋可永日洗耳聽飛瀑

燕子磯夜泊

重岩綠掩月華明烟水微茫隔帝京一夜思親萬行淚隨風洒遍石頭城

月下再別英才

客去堂空夜已悠為君心折更淹留不妨坐盡窻前月莫待相思獨倚樓

明宮詞

龍飛萬國會衣裳奠鼎金陵作未央蕭相不須誇壯麗聖朝恭儉法虞唐

六宮夜靜試秋砧親自裁衣賜羽林高后當年崇

儉德至今累葉嗣徽音

九天闔闔日遲遲諫草淋漓出鳳池不似開元全

盛日詞臣僅賦早朝詩

宣宗勤政御文華玳瑁簾移日影斜罷獵長楊芳

草綠春風不敢闔鈿車

本朝端化自睢麟肅肅威儀幸至尊漫說豹房多

內嬖宮幃曾不染纖塵
 玉熙春暖柳絲輕曲按梁州歌吹清一自河南烽
 火急梨園久絕步虛聲
 妖火常侵太乙垣宮門夜半羽書傳可憐內殿淒
 涼月照徹焦勞十七年
 長門人去夜悠悠金井霜飛玉簫秋一曲哀蟬歌
 未闕椒房陰火碧燐浮
田貴妃卒思陵哀悼擬哀蟬曲一章因羽書夜警未終篇而七
 滔天逆賊肆么魔夜半乘墉盡楚歌血染未央宮
 草綠至尊揮淚自橫戈

劍光凜凜耀秋霜手刃皇姬血滿裳獨有愛民心
 倍切一行遺詔淚千行
 血書滿把恨纏綿慷慨投鏢大義全萬歲峰前春
 不到龍衣常掛海棠烟
 巾幗鬚眉事總非幸留正氣在宮幃殉身報主全
 高節彤管千秋映日輝
 葉時從

時從字大立西洞庭山人著拜石居稿一卷

會食山居

七十二峯

西山

卷七十三

食貧固易適升斗亦滿欲兒女欣然飽不分蔬與
肉窓前理素琴几上展書讀白晝共開顏倦來安
穩宿死生各有分何事爭羸縮

達人貴識時哲士羞干祿摩詰輞川詩淵明東籬
菊清泉飲一瓢素布裁幾幅嘯咏山頭月時穿溪
外竹既足侶魚蝦尤堪友麋鹿

返洞庭述懷

少小栖深山隨分入城郭洗眼看人忙如風捲秋
籜闐闐走貪癡蘭舟蕩輕薄高軒者夔龍載筆者

伊霍往哲不可追時彥徒相矜研席判升沉知心
嘆離索懷人徒搔首豈若盟鷗鶴鼓枻泛具區還
山尋舊壑泉石猶巉爔喬林已非昨昔隱商山皓
今奚不古若托跡如寒萍秋來悲水涸歲月易人
情吐茹撼強弱投契止高山療俗無良藥素心自
有托勿用傷瓠落但師寥廓意不受樊籠縛開襟
挹太和白雲歸簾箔

輓虞部叔

叔居汾湖世變棄家
予在洞庭未能相從

宦情仕亦澹宦操隱亦堅秋霜炤秋月凜冽生孤

鮮酬君平日志豈受七尺牽慷慨有餘憤一往仍自然俗子悲其往浩氣伸重泉

在周仲連逝在宋太虛亡

泐大師降箕云叔前身為秦太虛前之前為魯仲連梅福

死者

原非死生者心徬徨譬之芳筵散後會不得常泰山頽於前梁木仆於旁縱解幽明理悲恨與時長蕭然作野僧拋家如敝屣撒手出門去再拜辭考妣今日綠溪頭明日碧山裡可仰不可追飄搖無定趾此正後人師長卧不復起天府聘脩文奚以安姻里

汾湖距洞庭不踰三百里兵戈滿江滸欲行還復止陸郵不巢雁水郵不食鯉方將追高踪悲哉忽已矣仁者造物壽今日胡睜爾天心不可憑痛恨太湖水

東笱

王井功徵賦

大道不一轍衆人不一心請觀翔集鳥各自選喬林川瀆嫌未遠巖阿恐不深掛帆命東指長作海濱吟

秋悲

七十二峯

西山

卷七十三

窈窕輕雲捲秋碧豆花徐吐纖纖白亂蛩迎序盡
 商音織女拋梭想疇昔月焰城南人遠戍思家靜
 夜悲行役紅顏不識骨如山夢裡相逢尚相謫衣
 帶飄風吹別離海棠白露凝愁色明星燦燦殞郊
 原彼黍離離誰得食把卷常思學古人古人生今
 徒嘆息

和金孝章十七夜候月

雲際孤光寂相邀把盞遲若淹游賞意偏慊靜觀
 私香燼琴初歇林昏蟲話滋一輪方在望露氣滿

瓊枝

聞星期捷音

未捷何妨逸士名一時駿足不停行儒衣漸撤經
 生債鼓角猶聞岐路聲方訝世人專重武忽驚文
 目不俱盲遲遲得雋因無意非是今年學始成

年髻

案首
入學

稻熟前疇想昔年黃雞紫蟹樂堯天山河不改汾
 干舊禮樂猶存俎豆邊徧地干戈筆固在滿汀烟
 火硯還全瑤章愈扁光逾燄莫禁雲衢早着鞭

葉青

青字萬峰少攻舉業間為詩歌即見推於吳日干
王玠右諸前輩乃數奇不偶晚年手定一編研友
錢賡吳序之謀剞劂壬辰秋有覆舟之厄詩卷盡
失萬峰嘆曰古人三不朽吾匪敢望或留此一卷
如劍南所云後世但作詩人看爾乃又不可得尚
何言哉子仁搜輯零篇剩句彙為一編題曰慎獨
齋遺草

南浦四民詠

蕭苙厓年登大耋脩嘗世故其所得頗奇
蕭翁真大隱揮斤雜藝士濁淖汙泥中不受塵埃
滓探道好淵微沉思得妙理情性豈外求尋遊展
高視懷故感滄桑含情憶蘭芷

周方城歷遊四方歸潛文室足跡不入城

市

周子深情士高懷屬古人薄遊太行道攬轡望蒼
旻南登鹿門山苑李感陽春羲和安可頓為樂當
及辰枳棘况充路流潦恐濡輪拂衣九州外溷跡

東海濱

胡玉如守業不移蕭然自得頗有先民風
玉如守錘鍛器市日流連食力不求贏屢空亦欣
然志與古人友興來自成篇高歌和者稀引杯如
吸川俯仰任宇宙樂以忘吾年

盛龍山心存厚道動與時乖未免有憂生

之嗟

龍山高尚士性本好詩書潔身懷大義此志取不
移落落塵區中悠悠多背違陽鳥知歲序越禽避

涼颼被褐吟海濱學問師良知戒彼庚桑言無庸
牽所思

吳姬怨

平江落日花繽紛年少懷人在楚軍寂寞慵粧理
新夢倚樓和淚數行雲笙歌初罷鴉夷渡牛羊漸
下要離墓江南江北同芳草王孫不歸春又老

相逢行贈王次典

憶昔僑居申浦里翩翩名輩蛟龍起肝膽意氣臭
味問望上相推執牛耳落魄窮途二十年將軍負

腹常爾爾世人白眼重黃金貧賤交遊寧復齒秋
來潦倒鶴市傷范叔一寒今若此俯仰宇內無知
音末路相逢有王子交臂遽作綈袍憐不惜游揚
季布美却來綠水泛紅蓮信陵門下陪珠履慷慨
高談術未工屈曲低眉道乃是天涯握手為君言
君言磊落殊可喜不如長嘯歸柴門與君坐看吳
山紫

金陵懷古

西風落日下平蕪走馬江城雁影孤故國飄零看

社燕行人寂寞聽啼鳥傷心勝負同棋局回首繁
華轉輓轡一片蔣山頭上月夜來猶照莫愁湖
風流南國勝長安天子歡娛徹夜闌辱井未能忘
玉樹青衣猶自憶雕欄空憐石馬風霜古誰信銅
駝蔓草寒滿耳砧聲催薄暮可堪獨立望長干

五十述懷

荏苒韶華五十年驚看鏡裡鬢皤然喜無榮辱何
求貴苟不飢寒即是仙沒齒永懷風木恨痛心忍
讀蓼莪篇知非豈特今方始久矣虛心愧聖賢

立德稱名一未曾捫心應自笑何能嚼來世味真
同蠟歷過人情恰似冰搔首不禁悲老大拊髀還
欲望升騰行藏若只仍如此歲月空教日漸增

次韻隔窗美人

隱約窓紗望眼慵天姿疑在畫圖中嫦娥神靜恒
居月飛燕身輕合避風綠綺無心求鳳侶藍橋有
路許誰通疎櫺春色微微露蝶舞蜂翻小院東

葉士鑑

士鑑字漢光號謙庵白沙里素封之家也喜吟咏

敦氣誼學詩於葉橫山先生橫山修南陽世譜主
其家者二載四方名士來遊洞庭而問奇字於橫
山者莫不以謙庵為東道主嘗與吳邑侯楊崇交
楊蜀人也罷官後滯跡吳門貧至不能舉火時謙
庵家已中落猶拮据以周其急楊病卒謙庵經理
其喪事且計扶柩還蜀費無所出乃葬之於東洞
庭之沙嶺交遊生死之際其有始終如此可以概
其生平矣所著勁秋草數卷

堤柳

堤上一楊柳亭亭水之曲弱翰非後凋秋冬枝葉
禿入歲飽春風新黃可人目舞招燕剪輕低拂曉
烟綠轉盼絮將飛即被東風逐造化多幻端物情
有往復盛衰同一途何論久與促寄語蛾眉人休
使黛痕感

看雲有感

平生雅愛雲與雲成莫逆晴看雲出山雨想雲觸
石舒卷兩無心行止共閒適今春過六峰道院聊
寄跡舉頭見雲飛薄似蜻蛉翼不意艷陽天變此

涼秋色問雲雲無言仰天長嘆息

雪朝以粟賑雀

晨窻亂群雀冒冷競謀食積雪遍郊原何處覓顆
粒哀其迫困窮握粟散窻側聊以賑爾飢少救此
朝夕雀翻群驚飛俄頃闕然集滿腹疑懼心患得
復患失一飽能幾何蹈此不可測雀乎吾語汝飲
啄好自適去此慎飛翔大地多荆棘

採茶詞

朝採茶暮採茶採茶女兒顏如花柔荑纖指綠雲

裹楊柳雙眉時一鎖採茶辛苦年復年定茶知賣
誰家邊紅絛一縷茶一股昨夜睡魔來賺我

寄衣曲

兒夫戟枕沙場月妾心望斷邊城窟西風刺骨白
苧涼馬嘶塞草連天黃寒衣打疊寄將去暗中着
意多添絮塵沙萬里迢迢路幾時得到黃花戍

賣花詞

碧紗窓外鶯啼曉賣花花叟出門早一聲叫罷一
聲續畫樓驚起人如玉垂髻侍兒門前立帶露揀

花纖指温含笑迴身入粧閣說道今朝花勝昨不
惜青錢買花朵對鏡粧成幾回顧美人頭上花雖好
容顏暗裡隨花換

老牛嘆

炎炎酷日正當午老牛車水不辭苦骨出猶然鞭
兩股主人不恤老牛憊只怪老牛筋力敗夫婦謫
謫商早賣老牛代耕年已久自分此身亦無負但
愿賣牛心莫起老牛不死耕不已

虞山慎高士作浮亭於西湖有詩賦之次和

悟得浮生趣，僑居屋似船。
繞梁湖面月，卷幕水中天。
境許魚蝦共，垣非薜荔牽。
他年訪高士，人與物俱傳。
早賣茶，中外被平山。人自公此，良亦無負耳。
一椽如蓋小，不定逐雲浮。
波皺層層影，風迴面面秋。
桑田頻易主，澤國自封侯。
歷盡蘇堤勝，生涯占海鷗。

小除金陵寓中同健南企石兩弟

卒歲猶為客，鄉心轉轆轤。
弟兄羈建業，冰雪憶菱湖。
籬落陰風吼，窻前冷月孤。
寒衣新寄到，憐殺夜

工夫

皇殿河晤公立大阮漢尊漢蒼諸弟

骨月五年別，離懷各自知。
春風楊柳夢，秋雨桂花詩。
同有人琴感，能無邱隴思。
今朝重握手，不覺淚雙垂。

同徐南州孫卓人吳魯傳家善伯訪慧真上

春日園人於慈雲禪院拈得房字

踐訪山僧約，携筇到上方。
盛衰松記憶，冷暖鶴商量。
梅老猶遲信，蜂寒未出房。
乾坤自寥落，何處問

行藏

吳允仁表姪招集天香書屋分韻得又字

春日園林好和風扇物華香泥勻燕子癡雨哭桃

花酒罇依三爵詩成愧八叉醉歸携短策新霽夕

陽斜

橫山夫子偕張嶽維沈歸愚談雲兮錢立山

潘語冰諸同學遊高峰卧佛寺

重陪几杖過山門事憶他年跡半陳隔嶂松風仍

別調當年春色屬閒身餐分齋鉢留餘飴話續禪

房去後因試看壁間題句在蘇墻今復記同人

無窮浩劫轉風輪生怕茫茫色界深夢斷半橋山

下路燈懸一點佛前心衆流合派終歸海雜響爭

喧敢廢琴浪說措身天地濶大千此際隱織針

路轉峰迴深復深愛他禪榻最多情半生知己松

相契廿載孤懷月共盟佛卧并忘無我相溪流空

作不平鳴年來未得安心訣好向支公卜去程

秋懷八首

秋到傷心想月圓碧城無夢鵲空傳露零青桂香

應濕被擁黃紬夜怕眠金鑰會須聽寂寂玉池誰
復憶田田遙知廿四橋邊路滿地霜華亦可憐
玉石紛紛殿上爭由他頑璞亦連城文章魑魅千
秋價冰雪神魂國士情落葉江潭憐宋玉西風易
水憶荆卿近來鬢影蕭疎甚怕聽梧桐夜雨鳴
寒林紅葉酒旗斜偏仄寰區浪作家風雨綠萼湖
上棹衣冠黃土夢中花斷鐘古寺敲殘照衰柳長
隄噪暮鴉幽憤漁陽休盡聽調悲原不待三搗
烏鵲南飛恨月明露寒城柝夜無聲書傳塞外人

無恙龍吼床頭劍不平月扇雲衣成底事酒帘歌
板自多情寒砧莫便催歸戍好讓韶華占鳳城
洪爐何處著冰霜飽聽松風夢自涼烏兔局中憑
轉劫魚龍隊裡儘排場亂峰斷水秋仍老荒迳疎
籬意不忘去去天涯休極目寸心久已怯瞿塘
槎上人歸路杳然孤篷無復想河源井梧霜老仍
栖鳳巫峽秋空好聽猿藥杵有聲憐月姊金莖無
露賜文園風檐夜雨蕭條甚夢隔紅樓笑語喧
白露蕙葭湖上秋柳疎遙見望中樓尺書漫憶青

楓驛一雁仍歸杜若洲老去蛾眉偏自好天生駿
骨本難收春風簾幕依然在好整流蘇再上鈎
荒林漠漠鎖寒烟一片平蕪接遠天夢裡居諸新
代謝醉中花月舊因緣情消別院燒燈後心寄西
風夕照邊驗取傷秋憔悴鬢毛點雪勝年前
潘稼堂太史枉顧以遊高峰寺詩屬和次韻
識破閑頭利與名身輕直可御風行一囊滿貯尋
山句隻字都成擲地聲爐篆午香僧夢熟竹敲疎
韻客心清摘來梅子塩堪和小試調羹手與烹

少年行

馬上白面郎意氣凌霄漢千金買寶刀不與妻孥
看

金彈打黃鸝黃鸝飛入谷不去收金彈仰面看鳴

鵲

輓高峰濟蒼和尚即次其回首偈韻

詩文廿載互糾彈老去江花轉瞬殘記得針鋒相
對露筆尖不放一些寬

偶書

唾碧啼紅總未然何須深為落花憐天涯不少無
情夢惆悵東風一面綠

葉夢林

夢林字行夏號印巖予聞之孫仰承家學年少能
文為郡學生聲名籍甚闈中俛得復失食餼有年
不及貢而卒時論惜之

感懷

感感不能寐孤月當窓照把卷讀五噫氣結不成
調何以解我憂呼酒影相弔醉來斫地歌醒來仰

天笑鹽車上太行騏驥淚亦掉不逢伯樂頽伏櫪
向誰叫

中秋夜雨小集

雲寒露冷氣橫秋風雨蕭蕭漫惹愁興到欲尋蟾
兔窟貧來誰典鷓鴣裘青衫浹濕雄心在白眼人
憎傲骨留深夜對君頻起舞幾時封作醉鄉侯

輓徐我庭

徐君買地葬師潘愚谷賦詩美之
今徐君仙逝因次愚谷原韵奉輓

松楸枝上月三更憑弔南州無限情馬鬣新封需
弟子夜臺長寂侍先生心存交誼非輕麥力挽頽

風不市名古道照人千載見安仁賦出鄙夫驚

雪夜同潘愚谷家世南飲周忍菴書齋

肯委雄心付寂寥清尊絳燭喜相邀書堂燕集觥
交錯雪嶺當窓月正饒笑領天機忘漏永醉談時
事共魂消座中盡是應劉客魄礪還將杯酒澆

葉士奇

士奇字藻庭紀革里人

春晴

風雨朝初霽遙天淨碧空鳥歌芳樹裡人倚画樓

中縷縷嬌雲艷枝枝仙杏紅春光無限好謀野有
誰同

聞歌

何處徵新曲因風到薜蘿落梅高引笛折柳細傾
醴白雪知應少陽春和豈多悲歡雖兩地平等視
如何

賦

蕭白雲映感少男春味豈多悲
蕭蕭兩山平
何處遊絲曲因風
隨柳絮高
何處游絲曲因風
隨柳絮高

留

同

中



